



Inatsisartut
/Maani

Att. Inatsisartuni ilaasortaasut, Knud Kristiansen aamma Gerhardt Petersen,
ATASSUT

KNI pillugu § 37 nr. 251-imut akissut

KNI A/S pillugu apeqqutininik Naalakkersuisut tigusaqarput, tulliuuttuni akineqartunik.

KNI A/S-imi aqutsinerup aaqqissugaanera iluarsiniarlugu Naalakkersuisut sunik pilersaaruteqarpat?

Akissut:

Apeqqummut tungavilersuut Naalakkersuisut isumaqatigilluinnarpaat aamma Inatsisartuni ilaasortaasutulli KNI A/S-imi ineriartorneq piffissami kingullermi ajorluartumik takusarput pillugu tupigusullutik. Siusinnerusukkut pisortaanerup, Claus Jensenip, soraarne-rata malitsigisaanik siulersuisuni ilaasortaasut 3, ataatsimeersuarnermi qinigaasut, tunu-arnissartik toqqaraat Naalakkersuisut paasivaat. Taamaattumik qinigaasut tunuartut taakku pingasuusut taartissaat naleqquttut nassaariniarlugit Naalakkersuisut maannak-korpiaq suliaqarput. Tamanna pereerpat, siulersuisut nutaat siullertut suliakkerneqas-sapput pisortaanermik ataavartussamik atorfinitsitinissartik, KNI A/S-ip iluani killilersui-sinnaasumik ingerlatseqatigiiffimmilu pissutsinik aalaakkaasunik torersunillu pilersitsi-sinnaasumik.

KNI A/S-imi siulersuisut tutsuiginartut pilerseqqqinniarlugit Naalakkersuisut sunik pilersaaruteqarpat?

Akissut:

Tutsuiginassuseq Naalakkersuisut naliliinerat malillugu kialuunniit nammineerluni angu-niagassaraa. Taamaattumik KNI A/S-imi siulersuisunngortussat anguniagassartussaas-sapput, uagut qinikkatut minnerunngitsumillu innuttaasut KNI A/S pitsaanerpaamik aqunneqarnera tatigileqqissagutsigu. Apeqqarissaarinissat eqqarsaatigalugit Naalakker-suisut ilisimatitsissutigisinnaavaat siulersuisuni ilaasortaasussatut piukkunnaateqartut tamatigut Naalakkersuisut siulittaasuannut kaffisoriartoqquneqartarmata, tassanilu ingerlatseqatigiiffimmik aqutsilluarneq najoqqutassallu allat nassuiarneqartarlutik. Siuler-suisuni ilaasortaasinnaasutut piukkunnaatillit taamaalillutik, siulersuisuni ilaasortaalluar-nissamat Naalakkersuisut naatsorsuutigisaat piumasaqaataallu, qiniganissartik siog-qullugu ilisimassavaat.

16-12-2013

Suliap normua 2013-093261

Dok nr 1418276

Postboks 1015

3900 Nuuk

Oqa. (+299) 34 50 00

Allakkasuartaat (+299) 32 50

02

E-mail: govsec@nanoq.gl

www.naalakkersuisut.gl

Pisortaanerusimasup aammalu siulersuisuni siulittaasuusimasup suliffeqarfimmut pisussaaffimminnik sumiginnaasimanerannut akisussaaffiliinissamik Naalakkersuisut pilersaaruteqarpat?

Akissut:

Soorlu tusagassiuutinut nalunaarummi allassimasoq, pisortaanerusimasumut tunngatilugu nalilersuinissaq aallajangiinissarlu Naalakkersuisut suliassarinnigilaat, akisussaaffik taanna maannakkut siulersuisuni siulittaasup nalilerumaarpaa. Siusinnersukkut siulersuisut siulittaasuat eqqarsaatigalugu Naalakkersuisut nalilerpaat, akisussaaffiliinissamut uppersaatissat naammangitsut.

KNI A/S-imi avataanit siunnersorteqartarnerup killilernissaat Naalakkersuisut sulissutiginiarpat?

Akissut:

KNI A/S-imi ingerlatsineq, siunnersorteqartarnerup ilanngullugu, Naalakkersuisut aallaviani akuliuffiginiannigilaat. Taamaattoq Naalakkersuisut eqqaasitsissutigissavaat, ingerlatseqatigiiffiup ileqquusumik ataatsimeersuarnerani Naalakkersuisut oqalugiaatiminni kingorna tusagassiuutitigut nalunaarummi, avataanit ikiorteqartarnerup annertusiarnera eqqumaffigeqquneqarmat taamaaliornikkullu ingerlatseqatigiiffimmut innersuussutigalugu tassunga tunngasunut aningaasartuutit qaffakkiaartorneri eqqumaffigeqqullugu.

Siulersuisussanngortut nutaat pisortaanermik pikkorissumik KNI A/S-ip iluani killilersuisinnaasumik ingerlatseqatigiiffimmi pissutsinik aalaakkaasunik torersunillu pilersitsisinnaasumik, siunnersortinik avataaneersunik atuinissamik pisariaqartitsinermik nalilersuisinnaasumik nassaarsinnaanerit, Naalakkersuisut tatigaa.

Pissutsinik immikkut ittunik, kiisalu pisortaanerup Claus Jensenip KNI A/S-imi atorfeqarnerani inatsisilerinermut tunngasunik misissuinermit Deloitte'p nassu-iaaneranut atatillugu Naalakkersuisut pissutsinik allanik erseqqissaanissaminnik kissaateqarpat?

Akissut:

Apeqqut Naalakkersuisut Siulersuisuni Siulittaasumut, Niels Thomsenimut, ingerlateq-qippaat, imatut allagaqartumut:

"Siulersuisuni amerlanerussuteqarluartut isumaqarput, imatut inissisimasugut, allamik periarfissaqarnata Claus Jensenimik suleqateqarnitsinnik taamaatitsissalluta, tak. Kukunersuiisartut nassuiaataat kingornalu inatsisilerisut nalilersuinerat. Taamatut aalajangiinitta kingorna KNI A/S-imut tunngatillugu iluaqutaanngitsumik eqqissiviillioortoqarnera, soorunami KNI A/S-imut iluaqutaanngilaq.

Tamanna oqaatigereerlugu, taava siulersuisut ersarissumik isumaqarput, ulluinnarni aqutsisut suleqatigalugit taamatut iluaqutaanngitsumik inissisimaneq iliuseqarfigalugu aallartereersugut. Inissisimanerup qaangernissaa eqqarsaatigalugu isumalluarpugut. Suliffiup iluani avataalu eqqarsaatigalugit - eqqissisimaneq, aalaakkaasuuneq tatigininnerlu pilersinniarlugit tamatta sulissuteqarpuq.

KNI A/S'ip aammalu suliffeqarfimmut attuumassutillit tamarmik iluaqutigissavaat, KNI A/S'ip iluani tassungalu tunngatillugu qitiutitat tassaasut sullitaasut aammalu suliffeqarfimmik iluanaarniuteqartumik ingerlatsineq. Tamatumani pissusissamisoortumik ingerlatseqatigiiffiup pilersuineramik suliffeqarfittut inissisimaneera aammalu tamanut tunngatillugu inuiaqatigiinni kalaaliusuni inissisimaneera eqqarsaatigalugit ".

Inussiarnersumik ilassinnillunga
in.in.


Aleqa Hammond